

Cydymdeimlad a Chofion

Gyda thristwch y daeth y newyddion yr wythnos ddiwethaf am farwolaeth Mrs Edna Evans (Llanfair). Estynnwn ein cydymdeimlad cywiraf â'r teulu yn eu profedigaeth. Yn yr un modd, cydymdeimlwn â Rhian Jones (Groes) a gweddill y teulu ym marwolaeth ei thad, Mr Emyr Jones, Rhuthun. Trist oeddem hefyd o glywed am farwolaeth brawd i Maldwyn Davies (Llansannan) a Megan Thomas (Cefn Berain), sef Eurwyn Davies o Llanefydd. Estynnwn ein cydymdeimlad â hwythau a gweddill y teulu yn eu profedigaeth. Gweddiwn y bydd y teuluoedd hyn yn adnabod holl ddaioni Duw yn gwarchod drostynt dros yr wythnosau a'r misoedd nesaf hyn.

Anfonwn ein cofion at Merfyn Hughes (Llansannan) sy'n parhau i gael gofal yng Nghanolfan Walton, Lerpwl, a chofiwn hefyd am Meira Jones (Groes) ac Emllyn Davies (Llansannan) ac eraill o'n plith sydd wedi bod yn cael gofal mewn ysbyty yn ddiweddar. Cyflwynwn hwy oll i ofal Duw gan weddiö y bydd pob un ohonynt yn cael adferiad iechyd buan iawn ac y bydd Duw yn ei holl ddaioni yn rhoi nerth a chysur iddynt yn eu hangen.

Cyrsiau Coleg y Bala

Dyma'r cyrsiau fydd yn cael eu cynnal yng Ngholeg y Bala yn ystod mis Mai:

- **Miri Mai 12-14 o Fai : i blant 8-11 oed.** Archebwch fan [hyn](#).
- **Penwythnos Chwaraeon 20-21 o Fai : i flynyddoedd uwchradd 7-10.** Archebwch fan [hyn](#).

Os nad yw'n bosibl i chi archebu arlein neu os oes gennych chi unrhyw gwestiwn plis cysylltwch â colegybala@ebcpcw.cymru / 01678 520565 iddyn nhw bostio copi o'r ffurflen gofrestru atoch chi. (Cofiwch mai hanner y pris fydd y gost i'r ail neu drydydd plentyn o'r un teulu, a bod Eglwysi Bro Aled yn cynnig £10 o ostyngiad i bob unigolyn mewn addysg sy'n byw o fewn dalgylch yr Ofalaeth hon ac sydd am fynyachu.)

Gwaith cwrs

Gwahoddir yr Ysgolion Sul i roi'r gwaith a wneir ar y Sul mewn llun neu mewn unrhyw ffurf/gyfrwng arall i greu arddangosfa yng Nghyfarfod Gwobrwyo'r Ysgol Sul a gynhelir yng Nghapel y Fron, Dinbych nos Wener Mai 26ain am 6.30 yr hwyr. Bydd angen mynd â'r gwaith i Gapel y Fron erbyn 5:45 yr hwyr ar y noson wobrwyo er mwyn iddo gael ei osod ar y byrddau.

Manylion Cyswllt

Rhodri – 📧 rhodri@eglwysibroaled.com ☎️ 01745 870522 📞 07814 660291

Mair – 📧 mair@eglwysibroaled.com ☎️ 01745 870632 📞 07900 627536

Cyhoeddiadau ar gyfer y rhifyn nesaf i'w hanfon i Mair erbyn nos Fercher (19^{eg}), os gwelwch yn dda.

Llais Bro Aled



Dydd Sul, 9 Ebrill 2023

eglwysibroaled.com

rhaglendorcas.com

llanw.org

Profiad digon rhyfedd yw cael eich atgoffa o ryw beth yr oeddech wedi ei anghofio. Mae wedi digwydd fwy nag unwaith i mi yn ddiweddar, a hynny'n bennaf oherwydd clyfrwch ffonau symudol a chyfrifiaduron. Erbyn hyn gall nifer o raglenni ddod â hen luniau neu fideos i'ch sylw i goffâu beth ddigwyddodd ar y diwrnod hwn flynyddoedd yn ôl. Yr wythnos diwethaf gwelais hen fideo o Lleucu'n canu a achosodd i mi ryfeddu gan mai prin yr oeddwn yn ei hadnabod, cymaint y mae hi wedi newid ers hynny. Atgoffa dymunol oedd hynny, ond gwyddom fod atgofion yn gallu effeithio'n drwm arnom, a bod yn eithriadol o boenus hefyd os ydynt yn ein hatgoffa o gyfnod neu berson annwyl yr ydym yn hiraethu amdanynt.

Dros y dyddiau nesaf bydd Cristnogion ar draws y byd yn cael eu hatgoffa o'r hyn a ddigwyddodd i'r Arglwydd Iesu oddeutu dwy fil o flynyddoedd yn ôl. Trwy gyfrwng darlenniadau o'r Beibl, emynau a phregethau, clywir am Fab Duw yn cael ei arestio a'i groeshoelio rhwng dau leidr, cyn i'w gorff gael ei roi mewn bedd. Petai hanes y Pasg yn gorffen yn y fan yma, mae'n annhebygol y byddai unrhyw un yn mentro galw'r hanes yn 'newyddion da'. Ond ar y trydydd dydd daeth neges ryfeddol yr oedd y ddwy Fair i'w rhannu â gweddill y disgyblion: "Y mae wedi ei gyfodi oddi wrth y meirw, ac yn awr y mae'n mynd o'ch blaen chwi i Galilea; yno y gwelwch ef." (Mathew 28:7)

Oherwydd yr Atgyfodiad mae Cristnogion yn cael eu hatgoffa o'r hyn ddigwyddodd i Grist yn ei gwmni Ef, gyda buddugoliaeth Iesu dros bechod a marwolaeth yn rhoi gobaith hyd yn oed i'r rhai sy'n hiraethu a galaru. I'r Cristion mae'r Pasg yn amser i fyfyrion ar ddifrifoldeb pechod a mawredd cariad Duw sydd wedi'i amlygu yn aberth unigryw ei Fab.

'Drwy aberthu ei hun un waith mae'r Meseia wedi glanhau'n berffaith y bobl mae Duw wedi'u cysegru iddo i hun am byth.' (Hebreaid 10:14 Beibl.net)

Felly wrth ddathlu'r Pasg, nid cofio digwyddiadau hanesyddol yn unig yr ydym yn ei wneud, ond gofyn i'r Crist byw, trwy ei Ysbryd Glân, effeithio'n drwm arnom heddiw, a phob dydd o'r newydd.

Cof am yr ŵyneb siriol
y poerwyd arno'n wir;
cof am y cefen gwerthfawr
lle'r arddwyd cwysau hir;

O annwyl Arglwydd Iesu,
boed grym dy gariad pur
yn torri 'nghalon galed
wrth gofio am dy gur. (CFF 500)

Cyhoeddiadau'r Fro

Dydd Sul, Ebrill 9^{fed}

- **Oedfa yn Llanfair** am 9:30 ac **yn Llansannan** am 11:00 o dan arweiniad Rhodri. Bydd **Ysgol Sul yr oedolion yng Nghefn Meiriadog** am 2:00.
- **Oedfa Thema yn Henllan** am 9:30 ac **Oedfa Deuluol Sul y Pasg yn Llanefydd** am 11:00 o dan arweiniad Mrs Nia W. Williams.
- **'Gwreiddiau'** – Amser o addoliad ar y cyd â Bro Dinbych yng Nghanolfan Eirianfa, Dinbych am 3:00 y prynhawn. Am fwy o wybodaeth, cysylltwch ag Andras Iago (07778 511672).

Dydd Mawrth, Ebrill 11^{eg}

- **NI FYDD Cinio Jangl** yn Ffestri Llansannan heddiw.

Dydd Sul, Ebrill 16^{eg}

Bydd dau gynrychiolydd o'r Henaduriaeth yn bresennol mewn un oedfa ymhob capel yn yr Ofalaeth naill ai heddiw (16^{eg}) neu Sul nesaf (23^{ain}). Trwy bleidlais ddirgel, byddant yn gofyn a ydych o blaid galw Gweinidog i fugeilio'r eglwys, a bydd pleidlais ddirgel arall yn cael ei chynnal er mwyn dewis UN aelod (nad yw yn flaenor nac yn ddiagon) i gynrychioli eich eglwys ar y Pwyllgor Bugeiliol (os bydd y Pwyllgor yn dod yn weithredol). Cewch enwi y nifer a fynnwch, ond yr aelod fydd wedi derbyn y nifer uchaf o bleidleisiau fydd yn cynrychioli eich eglwys ar y Pwyllgor Bugeiliol, ynghyd â blaenoriaid a diaconiaid yr Ofalaeth, a chynrychiolwyr o'r Henaduriaeth a'r Cwrdd Chwarter.

- **Oedfa yng Nghefn Meiriadog** am 9:30 ac **Oedfa (a phleidleisio) yn Llansannan** am 11:00, y ddwy oedfa o dan arweiniad y Parch. Aron Treharne. (Bydd pleidlais ddirgel arall hefyd yn cael ei chynnal yn Llansannan i ofyn a yw'r eglwys yn bleidiol i ethol mwy o flaenoriaid.) Bydd Ysgol Sul y plant yn cydreddeg â'r oedfa yn Llansannan.
- **Oedfa (a phleidleisio) yng Nghefn Berain** am 9:30 ac **Oedfa (a phleidleisio) yn Groes** am 11:00, y ddwy oedfa o dan arweiniad Rhodri. Bydd **Ysgol Sul yn Groes** am 10:15.
- **Oedfa (a phleidleisio) yn Saron** am 10:00 ac **Oedfa (a phleidleisio) yn Nantglyn** am 2:00, y ddwy oedfa o dan arweiniad Mr Arawn Glyn.
- **Cyfarfod Eglwys Hiraethog (a phleidleisio)** yn y Granar, Llansannan am 5:30.
- **Oedfa'r Fro** yn Llansannan am 6:00 gydag Eryl Davies yn arwain a Rhodri yn pregethu.

Dydd Mawrth, Ebrill 18^{fed}

- **Cinio Jangl** yn Ffestri Llansannan am 12:00.

Dydd Sul, Ebrill 23^{ain}

Gweler y cyflwyniad o dan Ebrill 16^{eg} i'r hyn fydd yn digwydd hefo'r pleidleisio.

- **Cyfarfod Gweddi (a phleidleisio) yn Llanfair** am 10:00 a **Chyfarfod Gweddi (a phleidleisio) yng Nghefn Meiriadog** am 10:30, a bydd **Ysgol Sul yr oedolion yng Nghefn Meiriadog** am 2:00.
- **Cyfarfod yn Llansannan** am 11:00 yng nghwmni Mrs Cheryl Williams fydd yn rhannu am Apêl Arbennig Cymorth Cristnogol – 'Hadau Gobaith'. Gwneir casgliad arbennig yn ystod yr oedfa. Bydd Ysgol Sul y plant yn cydreddeg â'r oedfa.
- **Oedfa (a phleidleisio) yn Llanefydd** am 9:30 ac **Oedfa (a phleidleisio) yn Henllan** am 11:00, y ddwy oedfa o dan arweiniad y Parch. Aneurin Owen. (Bydd pleidlais ddirgel arall hefyd yn cael ei chynnal yn Henllan i ofyn a yw'r eglwys yn bleidiol i ethol mwy o flaenoriaid.) Bydd Ysgol Sul y plant yn cydreddeg â'r oedfa yn Llanefydd ac **Ysgol Sul y plant yn Henllan** am 10:00.
- **Oedfa yn Saron** am 10:00 ac **yn Nantglyn** am 2:00 o dan arweiniad Rhodri.

Rhaghysbys

- Cynhelir oedfa arbennig **nos Sul, Ebrill 30^{ain}** yn Llansannan am 6:00 yr hwyr i ffarwelio ac i ddiolch i Rhodri am ei wasanaeth dros y blynyddoedd inni yma ym Mro Aled. Bydd croeso cynnes i bawb i'r oedfa.

Gŵyl Llanw 2023

Bydd yr Ŵyl Gristnogol 'Llanw' yn cael ei chynnal yng Ngwersyll yr Urdd, Llangrannog yr wythnos hon, rhwng Ebrill 10^{fed}-13^{eg}. Cynhelir oedfa pob bore a phob nos, a bydd seminarau amrywiol yn cael eu cynnal yn ystod y dydd. Y prif siaradwr nos Lun, nos Fawrth a nos Fercher fydd Stuart Bell, a bydd John a Rachel Settatree, Simeon Baker a Nan Wyn Powell-Davies yn arwain yn y boreau yn eu tro. Bydd gwaith plant a ieuencid yn ystod yr oedfaon yn y bore a'r hwyr, a bydd cyfle hefyd i fanteisio ar gyfleusterau'r gwerysll yn ystod y dydd. Wedi oedfa'r nos bydd cyfle i ymuno mewn gweithgareddau anffurfiol pellach neu gyfle i ymlacio a chymdeithasu. Ewch i'r wefan llanw.org/llanw-23/ i gael mwy o fanylion.

Casgliad Cenhadol Chwiorydd y Gogledd (EBC)

Os ydych yn dymuno cefnogi gwaith cenhadol yn lleol a thramor, bydd trysorydd eich eglwys yn ddiolchgar o dderbyn eich cyfraniad **HEDDIW** fan bellaf, os gwelwch yn dda. (**Nodyn i'r Trysoryddion:** A wnewch chi roi gwybod i Mair erbyn Ebrill 11^{eg} gyfanswm casgliad eich eglwys, ac yna trosglwyddo'r arian i Mair naill ai ar-lein, neu trwy anfon siec yn daladwy i 'Gofalaeth Bro Aled', mor fuan â phosib wedi hynny, os gwelwch yn dda?)